

植物名實圖考

植物名實圖考卷之三十八

固始吳其濬著

蒙自陸應穀校刊

木類

野鴉椿 二圖

化香樹

土厚朴

酒藥子樹

苦茶樹

吉利子樹

萬年青

繡花鍼

馬棘

賭博賴

萬年紅

野樟樹

赤藥子

鬧狗子

野漆樹

山桂花

見風消

紫荊花

欖花

拘那花

寶碗花

倒掛金鉤

刺楓

了楓小樹

三角楓

又一種

十大功勞

又一種

望水檀

烏口樹

旱蓮

水楊梅

香花樹

接骨木

野紅花

虎刺樹

半邊風

小銀茶匙

田螺虎樹

水蔓子

白花樹






野鴉椿

野鴉椿生長沙山阜叢生高可盈丈綠條對節節上發小枝對葉密排似椿而短亦圓似檀而有尖細齒疎紋赭根旁出畧有短鬚俚醫以爲達表之藥秋結紅實殼似赭桐花而微硬迸裂時子著殼邊如梧桐子遙望似花瓣上粘黑子 按唐本草賣子木形狀極肖亦云子如椒目在花瓣中則焦紅者其花耶附以備考



化香樹

化香樹湖南處處有之高丈餘葉微似椿有圓齒如橡葉而薄柔結實如松毬刺扁亦薄子在刺中似蜀葵子破其毬香氣芬烈土人取其實以染黑色 按本草拾遺必栗香味辛溫無毒主鬼氣煮服之并燒爲香殺蟲魚葉搗碎置上流水魚悉暴鯁一名化木香詹香也葉如椿生高山堪爲書軸白魚不損書也又海藥本草主鬼疰心氣斷一切惡氣葉落水中魚當暴死核其形狀頗相彷彿名亦近是惟此樹之用在毬染肆浸曬盈筐累甕而拾遺不及之以此爲疑俚醫以爲順氣散痰之藥




土厚朴

土厚朴生建昌亦大樹也葉對生粗柄長幾盈尺面緣背白頗
脆枝頭嫩葉卷如木筆味辛氣香土人以代厚朴亦效



酒藥子樹

酒藥子樹生湖南岡阜高丈餘皮紫微似桃樹葉如初生油桐葉而有長尖面青背白皆有柔毛葉心亦白茸茸如燈心草五月間稍開小黃白花如粟粒成穗長五六寸葉微香土人以製酒麴故名



苦茶樹

苦茶樹生長沙岡阜高丈餘枝葉蒙密紫莖細勁多杈枒附莖生葉長寸餘微似臘梅葉光脩而皺面濃綠背淡青深紋稀齒葉間附莖結實圓長有直紋大如梧桐子生青熟黑葉味苦回甘生液土人採以爲茗

